

Kommunit inatsimmi peqqussutaasut naapertorlugit pisortat ikiorsiissutinik tunniussinnerminnut atatillugu qanoq annertutigisumik ikiorsiissutit aningaasannngornagit tunniussisarnersut misissoqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinnermut atatillugu aamma innersuussutinik saqqummiusseqqunneqarput inatsisitigut qanoq pitsaanerpaamik kusanarnerpaamillu qularnaarneqarsinnaanersoq, atisassat aamma allat meeqqat pisariaqartitaat eqqarsaatigalugit angajoqqaat kiisalu allat meeqqanut angerlarsimasunut isumassuisut qulakkeerisalernissaat siunertaralugu. (Inatsisartunut ilaasortaq Nivi Olsen, Demokraatit)

Akissuteqaat

(Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoq)

1. Siullermeerneqarnera

Naalakkersuisut Inatsisartut aalajangiiffigisassaattut siunnersuummut qujapput.

Innuttaasut tamakkerlutik inuuniarnermikkut ajunngitsumik ingerlanissaat qulakkeerneqartussaavoq. Tamanna ilaatigut pisortanit tunniuttakkat aqutigalugit pisussaavoq, tamatumunnga ilanngullugu pisortanit ikiorsiissutit aqutigalugit. Uagut inuiaqatigiittut innuttaasut arlaannik pissuteqartumik imminnut ikiorsinnaannginnertik pissutigalugu piffissami sivikinnerusumi sivisunerusumiluunniit pisortanit ikiorserneqartariaqartut imminnut ilaqutaminnillu pilersuisinnaalernissaat tikillugu ikiortussaavavut. Naalakkersuisut inunnik isumaginninneranni tamanna tunngaviulluinnarpoq.

Pisortat ikiorsiissuteqartarnerat pisortanit ikiorsiissutit pillugit Inatsisartut peqqussutaanni malittarisassaqaartinneqarpoq.

Pisortanit ikiorsiissutit isumaginninnikkut ikorsisutaapput pingaarutillit, taakkunuunatigut qulakkeerneqassaaq innuttaasup imminut ilaquttaminillu pilersuisinnaanngitsup ikiorserneqarnissamik qinnuteqarsinnaanera. Pisortat ikiorsiissutaat immikkut nalilersuereernermi tunniunneqartarput, nalilersuernermi aappaasoq inooqataasorluunniit kiisalu meeraqarsimagaanni meeqqat eqqarsaatigineqassapput. Aamma sulilersitsiniarneq, piginnaanngorsaqqinnissaq iliuusissalluunniit allat innuttaasup imminut pilersorsinnaalernissaanut ikiuutaasussat pillugit iliuusissatut pilersaarusiortoqarsinnaavoq.

Kommunit taakkuupput pisortanit ikiorsiissutit pillugit sulianik suliaqartussat. Inatsisartut peqqussutaanni § 17, imm. 2 naapertorlugu pilersuinnermut akiligassanullu aalajangersimasunut pisortanit ikiorsiissutissat aningaasannngornagit tunniunneqarsinnaapput imaluunniit akiligassamik nassitsisumut toqqaannartumik tunniunneqarsinnaapput, pissutsit immikkut ittut tamanna pisariaqartippassuk. Tassa kommunit ullumikkut periarfissarivaat

allatsitsineq atorlugu pisortat ikiorsiissutaannik tunniussisinnaaneq, assersuutigalugu nerisassanik, atisanik allanillu ulluinnarni pisariaqartitanik pisiaqarnissamut.

Naalakkersuisut nassuerutigissavaat innuttaasut pisortat ikiorsiissutaannik pissarsisartut arlallit ajoraluartumik imminnut ilaquuttaminnillu isumaginnippiarsinnaanngitsuummata. Imigassamik atornerluinerup allanilluunniit pinngitsoorsinnaanngisanik ajornartorsiuteqarnerup innuttaasut pisortat ikiorsiissutaannik pisartagaqartiinnarsinnaavaat.

Naalakkersuisut immikkut ittumik ukkatarivaat innuttaasut ajornartorsiuteqartut, taamaammat susassaqarfinni assigiinngitsuni arlalitsigut suliniuteqartoqarpoq, neqerooruteqartoqarpoq il. il., taakkununnga ilanngullugu isumaginninnikkut suliaqarfimmi neqeroorutigineqartarput ilaatigut ilaqutariinnut sullissiviit qimarnguiillu, ilaqutariit siunnersoqatigiissinneqartarnerat, inuit kinguaassiuutitigut atornerlunneqarsimanermik kingunipilutsitsisut katsorsariartorlugit angalasartut, persuttaasartut katsorsarneqarnissaannik neqeroorfigineqartarnerat il. il.. Innuttaasut atugarliortut, taakkununnga ilanngullugit innuttaasut atornerluisuusut suliniuteqarfigineqarnerisa pitsanngorsaaffigineqarnissaat pillugu Naalakkersuisut kommuninik qanimut oqaloqateqartarput.

Pisortanut akiitsorineqartut amerliartornerisa takussutissaraat ilaqutariippassuit ullumikkut imminnut pilersorsinnaannginnerat. Tamanna assigiinngitsorpasuaarnik pissuteqarsinnaavoq taamalu tamatuma iliuuseqarfigineqarnissaanut aaqqiissutissanik assigiinngitsunik pisariaqartitsisoqarluni.

Innuttaasut ilaqutariillu ataasiakkaat akiitsoqalersinnaanerata pitsaaliorniarlugu tigussaasumik assersuutigineqarsinnaavoq suliniut nutaaq. Suliniuteqarnermi siunertarineqarpoq Kujataani akiitsunut tunngasunik siunnersuisarnissaq pillugu misiligummik suliniuteqarnikkut akiitsoqalersinnaanerup annikillisarneqarnissaa imaluunniit ajorluinnartumik pisoqartillugu attartorlugu inigisap annaaneqarsinnaanerata pinngitsoortinniarnissaa. Suliniummi ukkatarineqarpoq innuttaasut aningaasaqarnikkut ajornartorsiuteqartut siunnersorneqartarnissaat aaqqiissutissarsiorlunilu suliniuteqarfigineqartarnissaat. A/S Inissiaatileqatigiiffik INI, Kommune Kujalleq, Grønlandsbanken Namminersorlutillu Oqartussat suleqatigiillutik 2017-imi 2018-imilu suliniut ingerlatissavaat. Tassannga misilittagarineqalersut tunngavississavaat suliniutip ingerlateqqinneqarnissaata nunallu sinneranut siammarneqarnissaata isummerfigineqarnissaa kiisalu innuttaasut aningaasaqarnikkut ajornartorsiuteqartut naapertuuttumik ikiorserniarlugit inuiaqatigiinnilu immiut pilersorsinnaaneq annertusarniarlugu suliniutissatut pisariaqartinneqartunut allanut isumassarsiorfiussallutik.

Naalakkersuisooqatigiinnermik isumaqatigiissummi takuneqarsinnaasutut Naalakkersuisut pisortanit ikiorsiissuteqartarneq pillugu inatsit aaqqissuuteqqinniarpaa. Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoqarfiup pisortanit ikiorsiissuteqartarneq pillugu inatsisip aaqqissuuteqqinneqarnissaa piareersarlugu aallartereerpaa.

Naalakkersuisut siusinnerusukkut nalunaarutiginiuuat Inatsisartut 2018-imi ukiakkut ataatsimiinneranni (UKA18) pisortanit ikiorsiissutit pillugit inatsisip allannguutissaatut siunnersuut saqqummiunneqassasoq.

Aaqqissuusseqqinnissamut siunnersuummik piareersaanermi ilaatigut suliarineqarput pisortanit ikiorsiissuteqartarnerup misissoqqissaarneqarnera, tassani immikkut ukkataralugit suliaqarfiit aalajangersimasut arlallit, taakkununga ilanngullugit suliffeqarfinnut isumaginninnikkullu tunniuttakkanut allanut, kommunit pisortat ikiorsiissutaannik aqutsiniarnerannut assigisaannullu tunngatillugit sunniivigeqatigiittarnernik ajornartorsiutaasartut.

Aningaasannornagit ikiorsiissuteqartarneq pisortat ikiorsiissuteqartarnerisa aaqqissuuteqqinneqarnissaa pillugu eqqarsaatersuutitut ilanngunneqassaaaq.

Misissueqqissaarnermut aamma ilanngunneqassapput pissutsit siunnersuuteqartup kommunit qanoq ikiorsiissutinik aningaasannornagit tunniussisarnerannut tunngassuteqartut misissorneqarnissaannik siunnersuutaa.

Pisortanit ikiorsiissutit pillugit inatsimmi aalajangersakkat malillugit kommunit qanoq suleriaaseqarnerannik ilisimasaqarnerulernissaaq pillugu siunnersuuteqartup kissaateqarnera Naalackersuisut taamaalillutik isumaqatigivaat.

Siunnersuuteqartulli siunnersuutaatut ikiorsiissutinik aningaasannornagit tunniunneqartartunik immikkut ittunik misissuinissaaq siunertamut naapertuutinngilaq, ilaatigut tunngaviatigut pineqartumik marloqiusamik misissueqqissaarnissaaq misissuinissarlu pinngitsoortinniarlugu.

Taamaammat Naalackersuisut inassutigaat siunnersuut pineqartoq itigartitsissutigineqassasoq.